

خالد أحمد عبد السميع

ابن الريف

زى ما الكتاب قال

أشعار

الطبعة الأولى يونيه 2018

بطاقة الكتاب

عنوان المؤلف : زى ما الكتاب قال

المؤلف : خالد أحمد عبد السميع (ابن الريف)

التصنيف : أشعار

رقم الإيداع : 13127 - 2018

الترقيم الدولي : 978-977-6656-38-3

عدد الصفحات : 98 صفحة

رقم الإصدار الداخلي: 208 – الطبعة الأولى يونيه 2018

الإشراف العام على جمعية تسهيل الطباعة الشاعرة سميرة محمودى

جميع حقوق الطبع والنشر محفوظة للمؤلف، ولا يحق لأى دار نشر طبع

ونشر وتوزيع الكتاب الا بموافقة كتابية وموثقة من المؤلف

دار النيل والفرات للنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجي عبد المنعم

المدير العام

جابر الزهيري



رخصة مزاولة مهنة: 58365 – سجل تجاري: 13242 / 2017 – بطاقة ضريبية: 572-01-35

عضو عامل باتحاد الناشرين المصريين رقم 941 لسنة 2018

هاتف: 01011256943 – 01116202218 – 01202541192 تليفاكس: 020554372901

البريد الإلكتروني: alnilwaalfourat@gmail.com

المقر الرئيسي: ج.م.ع. محافظة الشرقية – العاشر من رمضان – مجاورة 13 – أمام سنتر الـ 13 – وقار 304

ج.م.ع. محافظة المنيا – أبو قرقاص – شرق الزعرة – خلف محطة السكة الحديد – هاتف 086214428

ج.م.ع. محافظة القليوبية – مركز طوخ – إيمى – هاتف 0132424735

(الغروه)

إهداء

الى حرف النون
اجمل حروف الكون
ندى ونغم ونادين
عقلي بهم مجنون

الى بناتي اعلی واعز ما عندي
من غرس بداخلي كل مشاعر الحب
طريقي الى الجنة

خالد أحمد عبد السميع

مقدمة ..

من يوم ميلادى
والدنيا ليه معاكسه
داخل لقيت أجدادى
بيقولوا دى النكسه
فى تسعه من أبريل
عام سبعة وي ستين
أنا جيت لقيتها كده
أنا قلت أعيش فيها
والا أسيبها لمين
لكن لقيت قلبى
حاسس لها بخنين
بيقول لى بيحبها
وناسها دول حلوين
يمكن عيشتها تعب
لكن بأصل ودين

زى ما الكتاب قال

بحبك زى ما الكتاب قال
يا عمرى وقصتى وموال
دا قلبى فى هواكى مال
يا سمرا قلبى ليك ميال
حبيبتي عندي ليكى سؤال
توافقى إني اكون خيال
واجيب لك مهر ألف غزال
وشبكه الذهب فى شوال
واضحى فى هواك بالمال
دا إنتى ليه راحة البال
ومهما عنك أنتى اتقال
بشوفك ذوق أدب وجمال
وحب جوه قلبى تلال
وقوه تهد أى جبال
يا لحن اتغنى فى الموال
يا نجمه فى السما و تنطال
يا شمس هله وقمر وهلال

بتعادی مین

بتعادی مین

قلبی و قلبك

والا

بتعادی السنین

روحي وروحك

والا

الشوق والحنين

الحب عمره

ما كان معانده

الحب شركه

ما بين روحيين

روحي وروحك

مشتاقين

حبهم

مش م النهار ده

حبهم

عمره سنين

حقهم
حب وموده
إرجعى
دول مجروحين
هوہ حبك
يوم معانده
ويوم حنين
والا عندك
ده محبه
وشوق سنين
إرجعى
وبلاش معانده
وارحمى
الشوق الدفين
إرجعى
وبلاش مناهده
إرحمى
جرح السنين

رحتي فين

غايبه عنى
من يومين
رحتى فين
قلبى روحى
لك مشتاقين
حاسين كأنتك
غايبه عنى
من سنين
واحشنى صوتك
اللى مليون
بالحنين
واحشنى أشوفك
حتى مره
مرتين
كل يوم
بيفوت فى بعدك

بتفوت سنين
نفسى أقول لك
كلمتين
قلبي حزين
لكن الحزن اللى فيه
يمكن يعدى بنظرتين
من غير كلام
ممكن يعدى باهتمام
الحب عندى
مش كلام
الحب عندى
إهتمام
لا فيه معانده
ولا فيه ملام
وحب قلبي
بالميزان
الكلمه منه تتوزن
مليون جرام
أصل قلبي
مليان غرام

راحة جاية

راحه جايه
أدام عنيه
لا قادر أنطق
ولا قادره هيه
قلبي بيغرق
ف عنيه ديه
غاوى وعاشق
رموش عنيه
وف قلبي راشق
حبي ليها
ساعة عنيه
ما تغيب عليه
أحس إني
غرقان في ميه
ولما أشوفها
أحس إني
ماسك كفوفها

ما بين إيديه
من غير ما هيه
تحس بيه
كان نفسى أعرف
لو هيه كانت
مشغوله بيه
وأقول لقلبي
إسأل عنها
يمكن دى قالت
أدام رموشها
ويكون حياءها
كمان حايشها

بحبك

بحبك دى مش كلمتى
بحبك دى إحساسى
يا أغلى من دنييتى
ويا كل إحساسى
بحبك بكل جوارحى
يا أغلى من الماس
دا القلب بيك يرتوى
ولا عمره كان قاسى
لو قلت ليك روحى
يكون ضعيف إحساسى
يا أغلى من روحى
وعندى أعز الناس
لو قلت ليك عقلى
أكون كدا قاسى
لكن أقول عمرى
وكل إحساسى

تستاهلي

تستاهلي احبك
لأن قلبك
مش زى قلب أى حد
تستاهلي حبي
لأن قلبي
إبتدى يحبك بجد
شغلنى عقلى
وحتى قلبي
إنشغل بيكى بجد
دا انتى الحبيبيه
إلى ابتديت
أعشقها جد
لحظة ما عيني
فى عنيكى جت
حسيت ساعتها
إن انا

حبیت بجد
شفت ف عنیکی
ولمسة إیدیکی
حنان بجد
شفت الرموش
حتى الشفايف
والخد ورد
ولا عدت شایف
بعدها
فی الدنيا حد

إنتي إيه

إنتي إيه فهميني
غاويه ليه تبعديني
كنت فاكّر لما شفتك
إن قلبك مشتريني
كنت فاكّر إن روحك
غاويه قلبي وتشتهيني
كنت فاهم حاجه تانيه
كنت فاهم روى غاليه
دا انتي روى ونور عيوني
كنت واهم نفسى إنك
تسمحى انى ف يوم أضمك
ضمة العاشقين لحضنك
بس خايف أقول بحبك
وان قلبي حته منك
لكن إن حسيت فى يوم
إن انا فعلا أهمك
هتلاقيني تحت أمرك

هيه القسوه

هيه القسوه ف طبعك والا
إتعلمت القسوه دى فين
دا إنت ف طبعك الحنيه
وقلبك كله اشواق وحنين
قلبي معاك مش راح أتخلي
عن حبك ولا حتى يومين
حبك ولع قلبي و خلى
النار أيده فى الخدين
كل كلام الحب له معنى
إلا كلامك له إثنين
إرحم قلبي معاك واستنى
أنا راح أشيلك جوه العين
إوعاك تنسى حبك ليه
دا احنا هوانا بقالو سنين
مش راح اسيبك تقسى عليه
انت حبيبى ونور العين

وهوريلك الحنيه
واعمل لك فى القلب كمين
لاجل تشوفنى تجرى عليه
ونعيش سدا احنا الاتنين

إو عاك تحلم

إو عاك تحلم
والا تفكر
قلبي يقول لك
يوم متشكر
من يوم حبك
انا مش بكبر
وقلبي سعيد
ولا لحظه اتوتر
وعيونى ناسيه
النوم وبتسهر
دا انت ف قريبك
شهد مكرر
أما ف بعدك
بشرب واسكر
إنت حبيب
العمر وأكثر

وانا من غيرك
مش راح افكر
إنى أعيش
ولا حتى اتصور
إن القلب
معاك يتغير
بس عموما
قبل ماتبعد عنى فكر
أصل انا قلبى
معاك متحير
حاسس إنك
ممکن تغدر
وتبيع حبى
ف لحظه وتهجر

إهداء لابنتى فى عيد ميلاتها

البت الوسطانيه

.....

ندى دى البنت الوسطانيه
نفس غلاوة اخواتها عليه
طيبه جدا صافيه النيه
قلبها أصله ملان حنيه
حتى عنيتها كمان عسلية
يوم ماتولدت ندهو عليه
سنة ألفين الميلاديه
أربعة وعشرين شهر تمانيه
قالو تعالى شوقها بنيه
قلت يا فرحه أغلى هديه
ودعيت ربى يخليها ليه
أحلى وأجمل أغلى صبيه
بس أهم شئ التربيه
كبرت صبحت فى الثانويه

وانا بدعيها كل شويه
وانا بتوضي من الحنفية
ربي اكرمها دي ضي عينية
تنجح تبقى طبيبه بشريه
يتباهى بها كل البشريه
أما اليوم دا بقول لها هيه
كل سنه تكوني متهنيه
وزي اليوم ده السنه الجايه
تكوني جاهزه راحه الكليه
إما تكوني طبيبه بشريه
يا إما تكوني صيدلانيه

عاوزہ تانی تبعدینی

بعد ما قربت منك
عاوزہ تانی تبعدینی
إنتی ناسیہ برضہ إنك
تبقى روحی وضی عینی
قلبی دا مشتاق لحضنك
لیہ فی لحظہ تہجرینی
لیہ فی لحظہ لما اضمك
أحس بیکی جوه عینی
قلبی نفسہ یحس إنك
لما اضمك تسبقینی
قلمی نفسہ یحکی عنك
وف غرامك یشتكینی
یكتب اللى شفته منك
بین سطور عمری وسنینی
یحکی عن قلبی وقلبك
عن عذابى وعن حنینی

نفسى أعر ف ليه قساوتك
ليه حبيبتي بتجرحينى
كل ما بتزيد غلاوتك
ألقى روحك بتنادينى
تدبحى قلبى بإيدك
وبعنيكى بتداوينى

غايبه عنى

غايبه عنى
من يومين
رحتى فين
قلبى روحى
لك مشتاقين
حاسين كأئك
غايبه عنى
من سنين
واحشنى صوتك
اللى مليان
بالحنين
واحشنى أشوفك
حتى مره
مرتين
كل يوم
بيفوت فى بعدك
بتفوت سنين

نفسى أقول لك
كلمتين
قلبي حزين
لكن الحزن اللى فيه
يمكن يعدى
بنظرتين
من غير كلام
ممكّن يعدى
باهتمام
الحب عندى
مش كلام
الحب عندى
إهتمام
لا فيه معانده
ولا فيه ملام
وحب قلبي
بالميزان
الكلمه منه تتوزن
مليون جرام
أصل قلبي مليون غرام

نور العين

فى عيد ميلادها
من غير ما اقول اسمك
كل الناس عارفين
باين فى عينى صورتك
والقلب كله حنين
ياالى الفؤاد رسمك
حروف على الجبين
فاكر كمان صوتك
يا ماما بابا فين
اخترت ليك اسمك
يا أول الغاليين
لما قالولى إنك
جيتى يا نور العين
وجريت عليك شيلتك
والبوس على الخدين
حسيت أنا بضممتك

وأبوه للغالين
وعشت انا ببسمتك
يا عمرى أحلى سنين
وكبرتى واتجوزك
راجل وزين الزين
لكن يكون مولدك
يا حبيبتي جوه العين
واليوم دا يوم مولدك
جينا ومباركين
وكل الحبايب جنبك
على حبي ليك حاسدين
قلت لهم انى أبوك
وان انتى نور العين
ودعيت ملك الملوك
يحفظك من شر العين

والله هنكيد العوازل

والله هنكيد العوازل
هنبقى فى الطالع
وهما دايمافى النازل
رب العباد عادل
للحق عنده منازل
لو جار عليك ظالم
إدعيه وراح ينصرك
دا الحق والعدل
وهوه بيك عالم
ردد وقول حسبى
ونعم الوكيل ربي
وعشان نكيد العدا
لازم يكون فيه رضا
وارضى بقضاء ربنا
دا كل شيء زایل

بدون حبر

مسكت قلمك...
لقيته مخلص حبر...
نسيت ورقك...
واخذت الكلام بالصدر...
عشان تحكى..
عن حاله..
عن الليله اللى كانت حبر...
شوف الروح
لما بتغوى الشعر... بتتكلم...
وتنسى القلم والحبر...
عشان روحك
دى روح شاعر....
بتكتب حتى فى الشارع...
وبتعب...
بدون ورقه..
بدون قلمك..
بدون حبر.....

القلب بيك یرتوي

بحبك دی مش کلمتی
بحبك دی إحساسی
یا أغلی من دنیتی
ویا کل إحساسی
بحبك بكل جوارحی
یا أغلی من الماس
دا القلب بيك یرتوی
ولا عمره کان قاسی
لو قلت لیک روحی
یکون ضعيف إحساسی
یا أغلی من روحی
وعندی أعز الناس
لو قلت لیک عقلی
أکون کدا قاسی
لکن أقول عمری
وکل إحساسی

نادين

نفسى أكتب ليك حبيبتي
واقول لكل الناس دى بنتى
واقول لهم إنك كبيرتى
والنهار ده عيد ميلادك
نفسى اقول ليكى انتى
كل سنه يا حبيبتي
وانتى عز ونور بلادك
وف حياتى يا حبيبتي
أشيل ولادك
يا حبيبتي يوم ميلادك
إبتدت يومها حكايتى
يومها قالوا إنك انتى
جيتى للدنيا ونورتى
قالوا مين قلت بنتى
إسمها يبقى نادين
قالوا ليه الاسم ده

قلت لاجل ان امها
تبقى نيفين
وحمدت رب العالمين

حب في المجهول

نفسى أعبر واقول
كلام يكون معقول
عن حب مليون هنا
عن حب فى المجهول
مش حب قلبى أنا
دا انا قلبى كله هموم
دى الناس تعانى سنه
وانا جرحى أد الكون
واللى تاعبنى أنا
إنى ببات مهموم
الحب مالى القلب
لكن ساقينى الغلب
فيه سهم كان مسموم
أنا كنت بهواها
والعين كمان والقلب
الكل يهواها
عاشق عيونها أنا

وافديها بعيونى
لو قالوا بتحبها
أقول...وبجنون

غاوية البعاد

انتى ليه غاويه البعاد

وكل يوم

ناسيه الميعاد

دى الحكايه

مش مناهده او عناد

لو كنتى

بتحبينى لسه

ارحمينى

واسبقينى

قبل

ما يفوت الميعاد

وان نويتى

من حياتى ترحلى.

اكتبلى...

ع الحيطان

او عمود الكهرباء...

او جواب

روحي

روحي..... يا ساكنه جوايه.
وسمعانى
اقول تانى.....؟
روحي..... يا ساكنه جوايه.....
فى وجدانى.....
بنادىكى..... واحلف لك اكون لىكى..
امسح دمعتك..... بايدى.....
وامسح دمعى..... باديكى.....
روحبعيد..... هنادىكى.....
وان جيتى..... هكون لىكى.....
وان رحتى..... وما جيتى.....
هقول لك..... روحى.....
ومش عاوزك.....
ومش عاوز اداوى جروحي.....

مين السبب في الحب ؟

الحب لو ينقسم يبقى يادوب حرفين
الحب ثمرة في قلبنا وبذورها نظرة عين
لكن نقول قلبنا بالحب قبل العين
طه عميد الادب .. بيبحب نور العين
الاسم سوزان .. واللون ما زيه اتنين
اجمل واحلى البشر بتحب اعمى البصر
لو قولنا ايه السبب هيقول عميد الادب
في الشرع جا بالنص
جملة .. وغض البصر
ازاي يكون بالعين والعين مبتفتحش
اذا كان عميد الادب في القول مصدقنهش
قدامنا اهو الاثبات
وازاي نجيب النفي

جانب من الذكريات

هدومي القديمه
فيها الماضي كله
وكل الذكريات
مش هلبسها تانى
لكن بحن ليها
لاجل افكر اللى فات
كانت أيام جميله
أو م المزارع أليمه
فرح أو كان أهات
بدايه من الطفوله
بكאותش وبالبحامه
واللعب فى الحارات
وفتره الدراسه
والقلم والكراسه
والفسح والرحلات
والخدمه العسكريه
الجيش والجهاديه

وبياده وأفارولات
ودبلة الخطوبه
والحب وأحلى زوجه
وزفه ورقاصات
والا أول ميلاده
والسهره فى العياده
وخلفة البنات
وأخرها النهارده
ما عدت عارف حاجه
ولا سبت من ثلاث
تبقى هدومى القديمه
شايله عمرى وسنينه
وقصص وروايات

لا للإرهاب

المساجد والكنائس
هيه دار لكل دين
واللى بيعمر مساجد
هما دول المسلمين
واللى بيدمر ويقتل
إتلعن فى كل دين
يبقى مين
وجه سلاح للساجدين
هاتوا دين
شجع فى يوم
على قتل دين
أو حرص
على عسكرى
جوه الكمين
دا الرسول
مبعوث رحمه للعالمين

يا اللى بتفجر وتقتل
إنت مين
إنت يا ابنى من البلد
والا منين
مصر دى أرض الكنانة
أهلها ناس طيبين
واللى حامى أرضها
هو رب العالمين
مهما تعمل
مش هتقدر
القادر هو المعين
المساجد والكنائس
عمرهم متوحدين
إوعى تنسى
إن ربى هو ربك
كلنا له موحدين

إنت الخسران

جوه المسجد
وقت اذان
وقت صلاة
الجمعه كمان
عمرى ما افكر
المسجد يملاه دخان
رافع إيدى
قلت أكبر للرحمن
عارف إن
الدنيا دى فيها
كله فان
عمرى وعمرك
شيئ له أوان
بس الفرق
ان انت جبان
أنا راح اسيب
الدنيا شهيد

الأوطان
أما انت
فى الدنيا شريد
زى الشيطان
وانا مش راح
اقول وأعيد
للى خان
أصل انا موتى
ده يوم عيد
للإنسان
واحلف لك
ألف يمين
إنت الخسران
إوعى تفكر
إن الخونه
يخشوا جنان
أو راح تطمع
يوم فى شفاعه
العدنان
أصل الرحمه

فى الإسلام
أجمل عنوان
إوعى الدم
يغير حبك
للألوان

فتح إنت

فتح انت علشان تشوف
ان حبي دا ع المكشوف
وان قلبي عليك ملهوف
هو يمكن فيه ملامح حب خوف
أصل قلبي اختارك انت بين ألوف
فتح انت وبص لى
فاكره إنك قلت لى
إنك انت مش ولى
حتى يوم ما كتبت ليه بعث لى
قلت عنك كلام كثير وشرحت لى
فتح انت وقول لى حاجه
قلبي ليك فى أمس حاجه
محتاجه حضنك..أى حاجه
إعترافى بحبى ليك مش سذاجه
والحنان ف عنيك دا برضه مش طيابه
فتح انت بلاش تخون

حب قلبي ليك جنون
يا شمس منورالى الكون
وان هنت انا مش راح تهون
وان ضاع ف لحظه حبنا مش راح أكون
فتح انت بلاش تتكلم
مطلوب منك بس تسلم
أصل هواك ف القلب معلم
ومهما يكون الحب جراح انا مش هتألم
لكنى بحبك يا حياتى أنا راح أتقدم

فى المولد النبوى

أعلنوا اليوم أننى انسان
فى مولد المصطفى العذنان
هوه شفيعى لجنة الرحمن
صلوا عليه اسمه فى كل أذان
من يوم ماجانا هداانا للإيمان
وملأ قلوبنا بالرضا والقرآن
أتانا برسالة ختم بها الأديان
وجعل لكل البشر مننا كيان
أعلنوا اليوم أننى إنسان
قلبه فى حب دينه استكان

حبك ليه

حبك ليه
هو قضيه
والا خلاص
قلبك مافيهوش
ريحة الحنيه
قلبك مات .
وانا راح البس
نفسى قضيه
من يوم فات
كنت معاكى
كنا بنحلم
إن أنا ليكى
وإنك ليه
كنت بشوف
ف عنيكى اللهفه
ولا بينتى

ف مره أسيه
لكن كل
ما اقرب منك
ألاقيكى تبعدى
عنى شويه
هوه هواكى
دا غصب ان عنك
والا القلب ده
مشغول بيه
أنا بهواكى وبتمناكى
تكونى رحلة
عمرى الجايه
إنتى الدنيا
وعمرى معاكى
هيكون كله
هنا وحنيه
بس سيبينى
أقرب منك
خلى القلب
يعيش له شويه

أنا محتاج لك
محتاج حبك
نفسى أضمك
والاقيكى ماسكه
إيديك ف إيديه
إنتى حياتى
إبتساماتى
إنتى حبيبتى
وكل ما ليه

بنت الريف

أنا بنت الريف المصريه
ماحبش عيشة الحريه
ولا حتى ف طبعى الملاغيه
مش سمرا إنما قمحيه
والدم خفيف بس شويه
متعلمه ومعايا كليه
حافظه القرآن ومصليه
وعلى أعلى عادات متربيه
على مية قله وطبليه
واللبس عبايه وجلابيه
واللقمه بسيطه بس هنيه
والقلب ملان بالحنيه
ولا عمرى عرفت الأنانيه
وأخواتى ياناس غاليه عليه
وبحب الريف أد عينيه

العروسه أهه

العروسه أهه
العريس جابهه
جابهام الكوافير
سقفوله كتير
العروسه منين
دول ياناس قمرين
دى أكيد مصريه
العيون عسليه
العريس فرحان
هيصوله كمان
خلى بالك منه
العريس دا لأنه
باين عليه بيحبك
ونفسه يسعد قلبك
عيشيه فى غرام
قولى له أحلى كلام
إوعيه يبات زعلان

والا تقولى له حرام
إلبسى له حرير
خلى عقله يطير
عريسك ابن حلال
فرحيه بعيال
حسسيه بالشوق
خليه منه يدوق
دا هو جى شاريكى
وقلبه عاشق ليكى

بنت الناس

هيه هيه بنت الناس
الى عريسنا اختارها خلاص
هيه هيه بنت العيله
الى فرحها خلاص الليله
هيه هيه ست البنات
الى جمالها بلح أمهات
هيه هيه بنت الأصول
الى جمالها بلح زغلول
إلحوا شوفوا رقتها
شوفوا جمالها وحلاوتها
شوفوا عنيتها القتاله
وقعوا ف حبها كام حاله
شوفوا عريسنا وجماله
راجل وامه داعياله
عريسنا زين زينة الرجال
جى طمعان فى الحلال

رشوا الملح على العروسين
يحرصهم ربي من العين

افرحوا

إفرحوا كده واتهنوا
سموا بالله واتمنوا
إبدعوا حياتكم بسم الله
لاجل حياتكم تصبح جنبه
إبدعوا حياتكم بالصدق
ربنا يزود فى الرزق
إبدؤوها كمان بحلال
ربنا يزود فى المال
إبدؤوها ببوسه فى الحال
إملوا البيت والحاره عيال
النهارده اتلم الشمل
الجواز كان أحسن حل
إوعى عريسك ليله يمل
هيكون ليكى شمس وضل
حافظى عليه حطيه ف عنيك
خليه يحس بعطف إيديك
حسسيه دايمه بالحب

خليه يسمع نبض القلب
حسسيه دايمًا بالغيره
خلي الشطه تبقى كثيره
إوعى تقولى ف يوم تعبانه
أو تعملى نفسك نعبانه

ز غروده

ز غروده واحده
ما تكفیش
هاتوا الشرطه
وهاتوا الجيش
العروسين
ماشيين بشویش
إید واحده
شرطه مع الجيش
تبقى الليله
ملانه نجوم
وقمرنا
عروستنا اليوم
واللى مجاش
الليله فرحنا
راح يندم
ويبات مهموم

واللى جامل ف مناسبتنا
راح نرعاه بمحبتنا
يا اهل الحى وحتتنا
هيصوا يله لعروستنا
زغردوا يله للعروسين
عاوزين رقص شمال ويمين
والحبايب ع الجنين
جايه تبارك للعروسين

مافيش أسرار

بعد الليله مافيش أسرار
إحنا الليله هنضرب نار
وما عدناش هنخاف من حد
ولا نعملش حساب للجار
بعد ما كان حكايتنا كلام
عاشين بيه كدا فى الأحلام
وبيتقال على كل لسان
أصبحنا فى غرام و هيام
وهندأ م الليله حياتنا
ونوزع ع الكون ضحكنا
والدنيا تفرح ويانا
ونكيد فى العزال براحتنا
واللى يغير راح نبعد عنه
لو شفناه راح نهرب منه
هنحطه فى الخانه السودا
بس هييجى اليوم ونقول له

كل الناس فرحانه معانا
بيهيصوا ورقصوا ويانا
والمزمار والعود والطبله
والكل بيسمع موسيقانا

راحوا فين الخياله

راحوا
فين الخياله
نادى
عليهم وتعالى
قول لهم
هنزف الليله
أحلى وأغلى
قمر ف العيله
هنرقصهم
ع المزممار
والمح
نرشه في الدار
ونولع
في بخور مع زار
والحصوه
ف عين الغيار

راح نفرح
الليله مع بعض
ولا نزعل
من بعض دا وعد
دى عروستنا
هتشوف السعد
وليالتنا
برق مع الرعد

لاجل الحبيب النبى

لاجل الحبيب النبى
عمرت أنا اقلامى
جبت القلم والورق
حطيته أدامى
أنا قلت أتخيله لقيته أدامى
عطرت باسمه الورق
وبدأت فى كلامى
بدأت الكلام بالصلاه عليه و بسلامى
طه الحبيب النبى
علمنى إسلامى
وعشان بحبه أوى
بيجبنى فى منامى
وكل ليله انتظار
بصلاتي وقيامى
عشمان أنول الرضا
والجنه تغوانى

حب وحنين

الحكاية كلمتين
حب وحنين
الأوله حب
حب قلبي
اللى مجروح
من سنين
سنين حلوه
قضتها معاك
كانت عيني
من النظره
تدوب فى هواك
كانت تتعد باللحظه
كانت عيني بتتمنى
تيجى اللحظه
أكون وياك
والتانيه هيه الحنين
حنين قلوب

مشتاقين
قلبي وقلبك
المحرومين
من عشق غالى
من ليالى
عشنا فيها عاشقين
من بعيد
كنا حاسين بالحنين
واشتياق
بعد البعاد وفراق سنين
والسبب
قلبي وقلبك
مظلومين

مفتاح قلبك

تحت إيديه
أنا خبيته
م الحراميه
من عشاقك
أيوه داريته
عشاق قلبك
دول أعدائي
خايف منهم
يقسوا عليه
خايف منهم
لو أخذوكي
روحي وقلبي
لو فقدوكي
مش راح اعيش
بعدك ولا ثانيه
بيكي ها اعيش
وأدوب حنيه

إنّتى حبيبتي
وضى عينيه
مفتاح قلبك
تحت أيديه
عشاق قلبك
مش عارفين
روحى وروحك
دول عاشقين

كلام كثير

نفسى اكتب لك كلام
يليق بقيمتك.
نفسى اثبت لك خلاص
انى فهمتك.
جوه قلبى
كلام كثير.
كل ما اجى
احكيه يطير.
نفسى اقعد
جنب منك.
واحكى
كل شئ يهمك.
حبك انتى
جوه قلبى.
بس مش
قادرا قولك.
نفسى اقول

انى بحبك.
المهم انك فى يوم
تسمعينى.
حتى لو من بعيد.
المهم ان عنيك
تيجى فى عينى

بيقولوا خان

بيقولوا خان
طب ليه يخون
وأنا حبي كان
حب بجنون
يمكن عشان
قلبي حنون
واديت أمان
فكر يخون
وازاى كمان
قلبي يهون
ويشوف هوان
على كل لون
كنا زمان
ننسى الظنون
ويبان حنان
يغطي كون
وقت الآذان

ندعى نكون
بيننا أمان
ولا يوم نخون
والمولى صان
قلبي الحنون
ولا عمره كان
يقدر يخون

صرخه

نفسی أصرخ بعلو صوتی
وأصرخ کمان وأعلى صوتی
نفسی أخرج من سکوتی
یا إما حقک یا إما موتی

آآآآآآه

آآآآآآه

آآآآآآه

کل حاجه لمستها بإیدیک معایا
کل هدمه لبستها هتکون مرايا
بنظره لیها أحس منها انک معایا
إوعاک تفکر ان دی هی النهایه
دا الأنبیا والصدیقین بعدین ضنايا
لکنی بحلف والقسم بالله کفایه
قلبی فرحان لک أوی إرحم بکایا
مش هقول انک مشیت
لأ روحک معایا

إو عاك تفكر يا ابني يوم
إن رصاص الغدر صابك
لكن أراد رب العموم
والميعاد ده كان ميعادك
جرحوني
وجرح قلبي ما عتش جرح
لو شفتوا قلبي هتعرفوا
إنهم دبحوني دبح
كل المعاني الحلوه راحت
لما ريحة الغدر فاحت
من ليله واحده يا ابني فانت
المشاعرو المعاني الحلوه ماتت
والنهارده عرفت حاجه
عرفت إيه معنى الشهاده
عرفت إنها مش وفاه
إنما لحظه ميلاده
وقت ما نلت الشهاده
إتفتح لك صفحه بيضا
إحكي قول لى
شفت فى الجنه مكانك

و72من بنات الحور عشانك
والامين
حط تاج الوقار فوق دماغك
كلمتين من ابوك عشانك
وعد منى فى رقبتى طارك

فكرت ف مره انك هتموت ؟

فكرت ف مره انك هتموت
وان القبر مافيش فيه صوت
فكرت ف عمرك لما يفوت
وانك تتلف ف كفن الموت
فكر لحظه انك فى تابوت
كنت وزير أو واد هلفوت
جوه القبر الكل سكوت
ولا فيه اصبر عدى فوت
ولا فيه موز ولا شجرة توت
عملك متدون فى النوت
يعلم بيه رب الملكوت
الى منجى يونس م الحوت

المسحراتى

مسحراتى
سهران ليلاتى
وطبلى ف يدى
عمال أنادى
لجمال وشادى
ونفين وهادى
من عند بيتنا
لفيت حارتنا
وخطوتى مهدى
أنادى إصحى
عامى وفصحى
إصحى ياولدى
عيل بيجرى
بفانوس بيضوى
ويقول ياجدى
وبنت جايه
بفستان حكايه

والخد وردی
طالبین أغنی
لیهم واهنی
وباسو خدی
أخبط بطبلی
واحد یجیبلی
ویقوللی خد دی
رمضان کریم
کنافه بکریم
وبکره عدی
فی کل عام
یيجی الصیام
شهر ویعدی
دا شهر صوم
بیزیل هموم
کله تحدی
صلاه وصیام
تراویح قیام
أیامه وردی

رمضان

أجمل شهر
يا ناس رمضان
رابع ركن
فى الإسلام
شهر بنختم
فيه القرآن
تلاتين يوم
الكل صيام
فيه الرحمة
والغفران
شهر تهجد
شهر قيام
فيه العتق
من النيران
شهر بكل
شهور العام
كله عباده

وكله إيمان
نبعد فيه
عن كل حرام
شهر بأمر
من الرحمن
فيه ليلة تسوى
تمانيين عام

يا شاغله قلبى

يا شاغله قلبى
بجبه ليكى
خايف عليكى
قلبى يوم
راح يشتكيكى
وان كنتى حاسه
إن قلبى يوم قسى
إسمحى
إنه يوطى
يبوس إيديكى
أصلى شارى
واللى جوايا
دا ليكى
مش هقول
إنى عاشق
لون عنيكى
أو إنى أتمنى

فِي يَوْمٍ
لَمَسَةِ إِيْدِيْكَى
أَوْ بَرُوْحَى وَعَمْرِى
يَا عَمْرِى أَفْدِيْكَى
أَنَا بَسْ يَكْفِيْنِى
إِنِّى أَحْلَمُ بَسْ بِيْكَى
أَوْ إِنِّى أَسْمَعْنِى
وَأَنَا بِنْدَهُ عَلِيْكَى
أَوْ إِنِّى أَبْعَثُ النُّجُومَ
تَسْأَلُ عَلِيْكَى
وَأَتَمْنِى حُضْنَكَ
لَأَجْلَ أَنْ يَكُوْنَ
حَسَنَ الْخَتَامِ
مَا بَيْنَ إِيْدِيْكَى

فاكره يا امه

فاكره يا امه
لما كنت
ف حضن قلبك
قبل الميلاد
كنت سامعك
داعيه دايمه
ربى يرزقنى بعباده
فاكره دكتور النسا
وقت المسا
واحنا عنده فى العياده
كنت دايمه
بسمع البنات
اللى عنده
تدفعك مره كشف
واتنين اعاده
كنت حاسس بالسعاده
وان الحياه سكر زياده

لما كانوا بينادوكى
 عامله ايه يا ام عباده
 طمنينا
 إمته ميعاد الميلاد
 كانت الفرحة ف عنكى
 وبابتسامه
 لسه شهر مش زياده
 كنت من جواكى شايك
 شايك النبض الزياده
 لما بتحسى انى ساكت
 والا بتحرك زياده
 حسيت فى حضنك بالدفاء
 ولا عمرى حسيت بالبروده
 كنتى دايما حارمه نفسك
 من كل حاجه
 م السعاده
 م العلاج خايفه لا
 يحصل لى حاجه
 تسع شهور شايلاى شيل
 شايفه ف كل ليله الويل

ومهما هعمل
مش هرديك جميل
بس بدعى ربي دايم
ليكى بالعمر الطويل
دا انا حبي ليك يا امه
حب ما لوش مثيل
يا اللى لمسّه من ايديكى
تشفى القلب العليل
أنا مهما هكتب لك
مش موفيكى
ومهما كتر الكلام
مش هكفيكى
دا ربنا بالجنه وعدك
ووصانى عليكى
وعشان بحب الجنه
أنا تحت رجلكى

ما بين الألف والميم

لأنى شاعر
والقلب مليان بالمشاعر
لميت حروف اللغة
وعملت واد شاطر
وحاولت أكتب كلام
يجبر لها خاطر
الأم دى مؤسسه
جواها ميت ساحر
الإسم من حرفين
حرف الألف الله
والميم محمد نبينا الزين
تبدأ حروف الهجاء
بحرف الألف والباء
أب و كان آدم
من ضلعه كانت حواء
وبين الألف والميم
أحبه موجودين

أب وأخ وأخت وعم
جد وخال
كل صلات الرحم والدم
ولما الميم للألف انضم
قلنا الغاليه دى تبقى الأم
وبعد الميم حرف النون
ويبقى الإبن وجوده تم
بعد ما تم وجود الأم

هو حبك يوم ويوم

هو حبك يوم ويوم
والا حبك يوم موده
ويوم هموم
حبي ليك مش حب لوم
حب ليل يعشق قمر وسط النجوم
حب بيزيد كل لحظه وكل يوم
من بداية لما شفتك
للنهارده وع العموم
قلبي خاف يغرق فى حبك
علمه قلبك يعوم
وان نويت بجد ترحل
هستناك لو ألف يوم

نصيحه

إتقى ربك ف اعمالك
خدها نصيحه هقولهاك
تلقى الدنيا دى ضاحكالك
ويطرح خير كده فى عيالك
إوعى تبص لمال غيرك
وارضى باللى قسمهولك
ربك عالم باحوالك
ولا فيش غيره يعدلهاك
دايما شكواك للمالك
تلقى عدوك كده هالك
إوعاك تغوى الا حلالك
كل عمايلك قاعدالك
واللقمه تكون بحلال مالك
تحفظ فى الجنه مكانك
ذكر المولى على لسانك
وحامده على كل احوالك
دايما صلى على حبيبك

يوم القيامة يبقى شفيعك
إو عاك تسهى على صلاتك
وتضيع عمرك و حياتك
عطر قلبك بصيامك
واتزين بزكاة مالك
وان حجيت هنيالك
هتكون أمك داعيالك
وختاما خلى رسالتى قدامك
لاجل تحقق أحلامك

رباعیات

1

مخنوق .. وماعدتش عاوز اكلم حد
الكل .. فاكرنى بهزر والله بتكلم جد
دا اناكل ماأبنى جدار فى ثوانى الاقيه يتهد
مع إن انا مالى حلال وكمان مش بظلم حد

2

كل شويه تصب لى كاس
ليه تدوخنى ف وسط الناس
عاوز تنسى وجودى معاك
دا انت يا واد من غيرى تحتاس

3

وصيت عيالى مش هندفن
بس يجيبولى يادوب كفن
وان شموا يوم ريحة العفن
غطونى بتراب الوطن

4

يا مرتشى إختشى
إلى أخذ قبلك مشى
يوم الحساب قرب
لا هينفعك مال ولا إشى

5

عمرى ما كنت بفكر فيكى
أنا مش هكذب لاجل ارضيكي
وان فكرت أحب هقول لك
أصل انا قلبى قافله عليكى

6

راح اعيش من غير قلب وهنسى
إن انا كنت ف يوم لىك مرسى
راح ابيع قلبى بكل ما فيه
واعلم عينى إزاي تقسى

7

قلبى دارمكتوب عليها
شقه فاضيه للإيجار
هو مش محتاج إيجار
قلبى محتاج بس جار

8

عمرى مافكرت انى أخونك
واتمنى يطول عمرى واصونك
أنا روحى بتعشق رؤياكى
و العمر ف نظره لعيونك

9

فاكره إن حبى ليكى كان زمان
دا انا قلبى مليون بالمحبه والحنان
وان فى مره حب غيرك والا خان
أدبحه قدام عنيكى ويبقى عبره للزمان

10

عاشق ترابك يا بلد
وروحى فيكى
ضحيت عشائك بالولد
وبعمرى أفديكى

11

سامحتك وقلبى بحبك ملان
ومهما تقولى هحبك كمان
يا أغلى ما عندى ماليش فى الخصام
دا قلبى بياضه بلون الحمام

الشاعر في سطور

إبن الريف: خالد أحمد

المؤهل/ ليسانس حقوق _

بكالوريوس زراعة (جامعة المنصورة)

الرقم القومي/ 26704091100334

العنوان/ ميت الخولي عبد الله .. مدينة الزرقا _

محافظة دمياط

محمول/ 01095539998 _ 01220021982

صدر له :

نويت أرحل عن دار النيل والفرات (طبعة أولى 2017)

زى ما الكتاب قال عن دار النيل والفرات (طبعة أولى

2018)

الفهرس

2	بطاقة الكتاب
3	إهداء
4	مقدمة
5	زى ما الكتاب قال
6	بتعاندى مين
8	رحتى فين
10	رايحة جاية
12	بحبك
13	تستاهلى
15	إنتى إيه
16	هيه القسوة
18	إوعاك تحلم
20	البنيت الوسطانية
22	عاوزه تانى تبعدينى
24	غايبة عنى
26	نور العين
28	والله هانكيد العوازل
29	بدون حبر
30	القلب بيك يرتوى

31	نادين
33	حب فى المجهول
35	غاوية البعاد
36	روحى
37	مين السبب فى الحب
38	جانب من الذكريات
40	لا للإرهاب
42	إنت الخسران
45	فتح إنت
47	فى المولد النبوى
48	حبك ليه
51	بنت الريف
52	العروسة أهه
54	بنت الناس
56	افرحوا
58	زغرودة
60	مافيش أسرار
62	راحوا فىن الخيالة
64	لا جل الحبيب النبى
65	حب وحنين

67	مفتاح قلبك
69	كلام كثير
71	بيقولوا خان
73	صرخة
76	فكرت فى مره إنك هتموت
77	المسحراتى
79	رمضان
81	ياشاغلة قلبى
83	فاكره يالامه
86	مابين الألف والميم
88	هوه حبك يوم ويوم
89	نصيحة
91	رباعيات
94	الشاعر فى سطور
95	الفهرس